

## **ICYUMWERU CYIZA CYA MASHAMI KURI TWESE**

Kuri iki cyumweru cya mashami tariki 25 Werurwe 2018, Nyiricyubahiro Musenyeri Anaclet MWUMVANEZA, Umushumba wa Diyosezi ya Nyundo yatuye Igitambo cy'Ukaristiya muri Cathedrale ya Nyundo, abonera no kwifuriza abakristu bose Icyumweru gitagatifu cyiza no kwitegura guhimbaza Pasika dukeye.



Bakristu, Bavandimwe, mbanje kubifuriza mwese icyumweru cyiza cya mashami.

Kuri iki cyumweru cya Mashami, icyumweru tumenyereye kwita icyumweru cy'Ububabare bwa Nyagasani, amasomo tumaze kwumva, urebye ntibyari ngombwa kuyigishaho, ahubwo byakabaye byiza ko duceceka tukayazirikana mu mitima yacu, tukifatanya na Yezu Kristu muri ubu bubabare bwe tumaze kuzirikana, cyane cyane muri iyi vanjiri.

Niyo mpamvu inyigisho yo kuri iki cyumweru igiye kuba ngufi , ariko mbasaba ko uyu munsu ndetse n'iki cyumweru cyose gitagatifu twazakomeza kuzirikana kuri ubu bubabare bwa Yezu Kristu kandi azira ibyaha byacu.

Kuri iki cyumweru cya Mashami, navuga ko tuzirikana ku bintu bibiri by'ingenzi:

#### 1. Ikuzo rya Kristu 2. Umusaraba wa Kristu

Twazirikanye ku ikuzo rya Kristu mu ntangiriro z'iki gitambo duhesha umugisha aya mashami twaje twitwaje. Muribuka ko igihe Yezu Kristu yinjiraga mu mugi wa Yeruzalemu, yawinjiranyemo icyubahiro cyinshi, abayahudi bamufata nk'Umwami, bagenda basasa ibishura byabo mu nzira aho yanyuraga. Iyo duhesha amashami umugisha, ndetse tukanayatambagirana nk'uko twabikoze, tuba twibuka iryo kuzo rya Yezu ubwo yinjiraga muri Yeruzalemu.

Nyamara rero iryo kuzo rya Yezu Kristu twongeye no kurizirikana ku bundi buryo, noneho atari mu byishimo, ahubwo ari mu gahinda ko ku musaraba. Yezu wari umwami bapfukamira, mukanya gato agahinduka ruvumwa, agasuzugurwa, akagirirwa nabi, agacirwa mu maso, bikageza naho ndetse abambwa ku musaraba. Bakristu , Bavandimwe, uwo musaraba wa Yezu Kristu, niwo twita Ikuzo rye, ndetse ugahindikira ukaba n'ikuzo ryacu nkuko Pawulo Mutagatifu akunda kubigarukaho. Koko rero ni kuri uwo musaraba Yezu yagaragaje ububasha bwe, ubwo yapfaga ku wa gatanu mutagatifu kw'isaha ya saa cyenda. Muri cya gihe isi yose yahindaga umushyitsi, maze kw'isi yose hagacura umwijima. Turibuka ko kandi muri icyo

gihe ari nabwo wa mubambiko wo mu ngoro y'Imana watanyutsemo kabiri kuva hejuru kugera hasi. Ivanjiri iduha ubuhamya ivuga icyo gitangaza cyatumye Umutegeka w'abasirikari wari uhagaze ahongaho yaravuze ati: "Koko, uyu yari Umwama w'Imana" .

Bakristu, Bavandimwe, ibyo byose: Ikuzo rya Kristu nk'Umwami w'Abayahudi, ikuzo rya Kristu nk'Umwana w'Imana, twabyumvise muri aya masomo ukwo ari atatu twumvise.

Mw'isomo rya mbere, Umuhanuzi Izayasi yabaye nk'uducira amarenga y'umugaragu w'indahemuka, wumvira ariwe Yezu Kristu, wemeye gupfa kandi urupfu rubi rwo ku musaraba, ariko agirango azatugeze twese mw'ikuzo ry'iteka.

Mw'isomo rya kabiri, Paulo Mutagatifu nawe yunze mu ry'Umuhanuzi Izayasi, nawe yagarutse kuri wa muntu Kristu Yezu wasuzuguwe, agacishwa bugufi kandi yari Umwami, kandi yari Umwana w'Imana.

Nyamara rero , Bavandimwe Yezu uwo watwitangiye, akemera kudupfira, iyo tuzirikana ububabare bwe, bige bitubera akanya ko gusubiza amaso inyuma, tukareba niba natwe ubwacu tubabaza Yezu Kristu, niba natwe tutamusubiza ku musaraba. Tujye twibaza niba natwe tutagira ibishuko byo gusa n'abamwihakana nka Petero twumvise wamwihakanye inshuro eshatu zose. Tujye dusubiza amaso inyuma, turebe imyifatire yacu, turebe umubano wacu n'Imana yacu, turebe umubano wacu n'abavandimwe bacu, turebe imvugo zacu, turebe imitekerereze yacu. Ndahamya ko hari aho tuzasanga natwe dusubiza Yezu ku musaraba kubera ko tutabaniye neza bagenzi bacu, tutabaniye neza abavandimwe bacu aho tuba , aho dukora; kubera ko tutahaye amahoro abaturanyi bacu, tutumvise akababaro kabo. Abo bese tutitaho cyangwa duhemukira, abo bese dutuma babahirwa n'ubuzima, tujye twibuka ko ari Kristu dusubiza ku musaraba. Iki cyumweru gitagatifu dutangiye, kikazatwinjiza muri Pasika ya Nyagasani ntikizadupfire ubusa. Kizadufashe kwivugurura mu buzima

bwacu bwa gikristu, cyane cyane nitwijira muri ya minsi itatu y'inyabutatau y'uwa kane, uwa gatanu n'uwa gatandatu mutagatifu tuzahavome imbaraga nyazo zizakomeza gutuma turushaho gusa na Yezu Kristu Umwami wacu.

Iki cyumweru gitagatifu kizatume turushaho kuzirikana aho ugukizwa kwacu kwaturutse, aka wa mugani w'abakurambere bacu ngo: Imbuto y'umugisha yera ku giti cy'umuruho. Tuzakomeze kuzirikana kuri Yezu wigize umuntu kandi ari Imana, yabibwira rubanda bati bambwa! Yaje abwiriza abantu gukundana, bo bati : Bambwa k'umusaraba! Abategetsi nka Pilato abonye ko azize ubusa, ati: sinishoboreye nimuzane amazi nkarabe, amaraso ye atazambarwaho, bityo aba yishe za nshingano ze zo kurengera abarengana. Mu Kinyarwanda dukunda kuvuga ngo: “ Rubanda yibagirwa vuba”. !!! Mu by'ukuri niko byagendekeye Yezu. Rubanda yihutiye gufunguza Barabasi w'umujura, w'umwicanyi; naho uwahumuye impunyi zikabona, ibipfamatwi bukumva, uwakijije abacumbagiraga, uwakijije abarwayi, awatubuye imigati akagaburira abashonji n'ibindi n'ibindi bati nabambwe kumusaraba, niyicwe. Nk'uko nabivuze haruguru Petero, ubwoba bumutashye ati: uwo muntu simuzi. Yuda intumwa yabanye na Yezu, ati : Mumpaye ibiceri 30 namubagabiza.

Nyamara Bakristu, Bavandimwe, ibyo byose Yezu abirengaho agaragaza urukundo, agaragaza imbabazi, ababarira abo bose ahereye kubamuhemukiye kugeza kubamwishe. Nguko ukwo natwe adahwema kutubabarira igihe cyose natwe tumushubije ku musaraba. Ngayo amizero dukesha Pasika ya Nyagasani twatangiye gutegura guhera kuri iki cyumweru cya Mashami. Mbifuriye icyumweru gitagatifu gihire.

Nyagasani Yezu nabane namwe.





**Padiri Jean Marie KWIZERA**